

四庫全書

集部

欽定四庫全書

莊簡集卷五

宋 李光 撰

七言律詩

余丈中大自虔還都陽弭節豫章南浦亭下相
從累日議論慨然志節彌勵感歎不足成鄙句
送行

抗志潛心六籍中文章直欲擬軻雄誰云前輩風流盡
尚有斯人氣味同南浦送行傷碧草北牕歸卧享清風

君王寤寐思黃髮會見蒲輪徵此翁

予得罪南遷朝廷樞密院準備差遣張君送伴
凡八十日子嘉其勤於其行也作詩送之

日日孤村對落暉瘴烟深處忍分離
追攀重見蔡明遠
贖罪難逢郭子儀
南渡可憂爲共墮北轅
應喜鴈相隨
馬蹄慣踏關山路他日重來更送誰

瘦筇羸馬一貂裘江浙湖湘得縱遊
萬里遠勞君伴送
隔年應笑我淹留
默祈衡嶽雲開嶺夜入浯溪月滿舟

北闕舊交如問訊為言白盡老人頭

分水鋪步月

人隨烏鵲正南飛月到中天列宿稀
遠近江巒明霽色橫斜烟霧助清輝
危亭搔首風傳笛迥野微行露濕衣
兒女未須頻悵望春來應與鴈同歸

余將卜居水東先以詩寄吳令

茅齋背郭面孱顏已有幽人約往還
學道遠尋岵嶺令卜居長占荔支灣

水東有荔支灣

窻間山色紅塵遠竹外碁聲白

畫間靜掃風軒同宴坐柴扉應為夜留關

簽判黃元功頃攝守蔚平枕江有小亭予假居
久之稍加葺治且作詩其上名之曰橫江今既
還職輒用寫呈

西來一水護山城突兀橫江占小亭春盡浪花浮竹屋
夜深漁火亂沙汀支頤塵榻清無夢隱几明牕醉有經
掃洒待君還舊隱却來相對守黃庭

寄內

予學道無力每世慮紛擾輒竟夕不寐間因
士友相過悠然數酌即投床酣寢始覺此物
乃有大功故入冬以來無夕不飲僕兵往來
流傳稍過妻孥輩遂以書相戒以此詩寄之
學道叅禪久不成惟將麴蘖破愁城三杯徑醉客已去
一枕未回天欲明長羨籬邊元亮醉誰憐澤畔屈原醒
甕頭濁酒須多釀準擬歸來細細傾

遷城南新居

背郭通幽面翠微病軀野性最相宜旋栽花竹頻開逕
恐礙雲山短著籬曉日臨牕時讀易晚涼隔屋聽評棋
三年瘴嶺無歸日聊向深林占一枝

次前韻

甕牖茅簷白版扉地偏猶與病相宜雨添山澗苔侵徑
竹近陽陂筍過籬三爵沉酣陶令酒一奩成敗謝公碁
車塵不到門前路漸覺蒿萊長舊枝

申之移竹數十竿植之後圃增賁幽人之居作

詩為謝

節槩平生慕此君
晚年流落偶相親
裝添小圃林泉勝
隔盡權門車馬塵
雨浥寒梢香掩冉
月歸疎影夜精神
他年亭下清陰滿
誰記當時種蒔人

再蒙自然使君寵和竹詩率爾為謝

畫手休誇最逼真
東牆月影畫難親

曹希蘊作墨竹詩云最愛小軒岑寂

夜月移清影上東牆蘇公每歎賞此句次韻吳傳正枯木歌云天公水墨自奇絕瘦竹枯松寓殘月夢回疎影

在東壁驚怪霜枝連夜發

常陪翠柏凌寒景
幾見天桃委路塵
鳴鳳

引雛來應瑞籜龍得雨便能神雙泉異日增幽勝開盞
時時中聖人

自然使君連賦竹詩輒復次韻

閒客攜觴日對君歲寒相與獨心親栽培野外千竿碧
抖擻甬中萬斛塵月影臨牕如見畫風輪長笋不無神
世言草木之長常在昧明間蚤作而伺之乃見拔起數
寸竹笋尤甚東坡和子由拔白髮詩云風輪曉長春笋
節使君好事頻吟賞蕭灑襟懷似晉人

瓊臺

玉臺孤聳出塵寰，碧瓦朱甍縹緲間。爽氣遙通天際月，

滄波不隔海中山。潮平賈客連檣至，

一云春深乳燕營巢穩 日晚

耕牛帶犢還安得，此身生羽翼便乘風。馭叩天關

一云五馬

醉歸簫鼓散折衝，尊俎靜夷蠻。一云村落年豐無吠犬，為傳夜戶不須關。

庭植家瓊山水北，小園頗幽勝。予頃寓雙泉，每

食罷招鄰士杖策訪之。園有小亭，常與客對奕。

因名坐隱。今歲亭側輒生雙竹，庭植二子皆卓

然有立，豈造物者產此以瑞其家庭乎？作長句。

贈之

桃笙溫勒漫成林並立林亭一徑深月下競看雙鳳影
風來時聽二龍吟冰霜不改夷齊操富貴無忘魯衛心

寄語園人頗愛護等閒莫遣斧斤侵

桃笙事見柳文
晉人多以龍鳳名

其子東坡答馬中玉詩靈運子孫皆得鳳
慈明兄弟孰非龍靈運謝氏慈明荀氏也

用孟博寄孟堅韻

汝到家時解我憂歸來何處過中秋夢遊滄海休回首
路入梧灘穩泛舟屋裏琴書無汝愛宅邊松菊為吾留

朋遊若問南方事莫說瓊州勝越州

丙寅元日偶出見桃李已離披海南風土之異
不無感歎獨追維三伏中荔支之勝又江浙所
不及也因并見于詩

逐客新年偶歎嗟海南風物異中華溪邊赤足多蠻女
門外青帘盡酒家庭院秋深時有燕園林春半已無花
堆盤荔子如冰雪惟此堪將北地誇

久旱得雨奉呈申之權郡學士

不用椎牛瀆帝鄉，精誠端可格穹蒼。
舉頭忽見千山雨，默禱惟憑一瓣香。
已度南天三伏旱，未妨北牖午風涼。
老蛟欲睡重鞭起，莫遣晴鳩喚夕陽。

次林庭植喜雨韻

一瓣黎沈徹九幽，隨車甘雨散民憂。
風聲震海驅雲出，雨點翻空捲地流。
午夜村墟無吠犬，夕陽坡隴有耕牛。
歡謠不獨聞田父，更向東陵覓故侯。

題將領占勝亭亭據雙泉之上，盡見城東南風。

物之勝落成之初屢來乞詩為賦長句云

結茅坡頂俯平川占得城東勝槩全
衮衮長江通瀚海森森喬木帶雲煙
月當庭戶初圓夜霧隱樓臺欲雨天

玉帳今聞罷刁斗却來閒處翫林泉

柯君近提兵撫遏黎人歸葺此亭

阜通閣

元壽使君到官未幾浚川築堤以通商賈之
利急先務也因為閣扁其榜曰阜通辱示佳
章因次其韻

危閣崢嶸枕碧流，籌心計慮匪人謀。
千飆不隔雲中樹，萬貨來從海外舟。
富國要先除國蠹，利民須急去民蠹。
使君不日歸華近，要路翔翔徧十州。

重陽後二日會嚴氏野趣亭坐客吳德永裴堯
文杜志林林元憲李彥實嚴君錫魏介然及予
八人因成拙詩以紀一時之集云

已過重陽得勝遊，海南秋色尚遲留。
旋沽白酒君須醉，未信黃花蝶解愁。
菡萏香浮曲沼靜，檳榔葉暗小亭幽。

始知風景中原隔對泣何須效楚囚

唐常建作破山寺詩云竹徑通幽處禪房花木
深歐陽永叔每歎賞此句以為不可及溫陵康
元壽守瓊踰年樂其地僻而事簡以清靜治之
於郡圃植竹數百竿中有小亭因榜曰通幽偶
成拙句

蕭灑襟懷慕子猷
猷猷栽修竹徑通幽
三間遠比淵明宅
百尺徒誇庾亮樓
風送鳥聲春寂寂
日篩簾影夢悠悠

一云花露泣殘春寂寂
寂鳥聲驚斷夢悠悠
破山絕景親曾到誰遣移來海外
州予重和戊戌嘗為
常熟宰破山在焉

八月十六夜江邊對月

晚雨冥濛洗瘴塵
斷雲遮月尚鱗鱗
影涵漲浦搖金鏡
光動天街碾玉輪
村市更無沽酒客
小樓時見捲簾人
不須辛苦瓊臺上
展席移觴近水濱

丁卯二月二十七日與客縱步至判官陳師正
所居前有花竹後有港浦愛其幽勝退作此詩

師正歷官九任今年六十有一母年九十二歲
杜門養親不復仕宦蓋瓊士之安貧守道者也
幽居非是避危機澀勒遮藏客到稀白髮不傳毛義檄
青衫常戲老萊衣舟行別浦隨潮去燕認低簷帶雨歸
從此欲尋碁酒社肯論時節叩柴扉

寄內

丁卯
九月

裊裊秋風度沈寥卧聞微雨打芭蕉黃花籬落重陽近
白髮江津客路遥家信隔年新恨過篋衣經暑舊香消

小槽正想珍珠滴海舶來時寄一瓢

悼亡子詩

并序

紹興辛酉子得罪南遷長子孟博從行明年
孟醇更戍以歸乙丑春再貶海外復來視予
踰年感微疾遂不起實丁卯孟冬二十三日
午未未初是日天氣澄霽里巷咸覩祥雲起
于屋隅中有水墨形了然冉冉升舉道俗駭
異因成此章以寫予悲昔延陵季子聘於齊

長子死葬羸博之間既封而號者三遂行其
言曰骨肉歸復于土命也若魂氣則無不之
矣孔子於繫辭曰精氣為物遊魂為變是故
知鬼神之情狀蓋曰變則無不之矣抑善者
陽之類惡者陰之類人之積善與陽俱升積
不善與陰俱降今吾子平生聰敏好學忠信
孝悌行業無少虧其死決不淪墮幽塗魂氣
超升蓋無可疑者予恐或者以予言為過因

備叙其事以示平昔從吾兒遊且審知其詳者云

脫屣塵寰委蛻蟬真形渺渺駕非烟丹臺路杳無歸日
白玉樓成不待年宴坐我方依古佛空行汝去作飛仙
恩深父子情難割淚滴千行到九泉

次韻陳列之感春二首

新年人物自熙熙綵索青帘到處垂日暖桃蹊花落盡
雨深茅屋燕歸遲登山野屐應頻蠟出郭輕車想載脂

老境逢春正愁絕為君援筆強題詩

堤柳垂垂拂路塵長條祇解絆歸人
營巢燕子穿簾急帶雨花枝照眼新
一壑風煙如可擅滿牀書帙未全貧
狂吟痛飲須公等枯木菴前草自春

四月十四日晚陳列之見顧追涼翫月於東橋
之上輒成長句以寫一時風景之勝

小橋浮動似乘槎坐看歸牛帶晚鴉
風捲斷雲飛玉馬水搖明月走金蛇
影翻鳳尾檳榔葉香散龍涎茉莉花

絕景勝遊仍有伴不妨流落在天涯

列之將歸溫陵以詩告別因次韻送行

相逢海上欲忘年誰似君家父子賢氣比金莖吞沆瀣

文如巖壑帶雲烟

李太白云世人之文如山無烟雲春無草木

追隨里巷吾

無伴獨步詩騷子有權青紫他年應俯拾定中何必問

諸天

八年嶺海未歸人萬里天涯老病身久墮黎蠻難擇友
頻經憂患易沾巾我無妙策甘捐棄子有長才預選掄

後夜更邀橋上月為傳義御且停輪

孟堅將北歸枕上成送行

還家準擬作重陽行止升沈豈在忙
童稚迎門歸亦好雲山作伴住何妨
經行汝政窮幽賞宴坐吾今喜夜長
解枕徑須尋舊隱誅茅先葺竹間堂

己巳二月己發書殊不盡意偶成長句寄諸子
姪并示元發商叟德舉資萬里一笑

囊空無物寄妻兒萬里惟憑一首詩
舊日琴書都磊落

新年行步漸羸垂時開竹戶通幽徑旋結茅庵倚小池

去冬郡差土丁開芙蓉後小池永日無人惟宴坐不貪杯酒不枰碁

已已重九小集拙詩記海外風景之異呈亭叔
十年重九老天涯異域空驚節物佳楊柳枝頭無落葉
芙蓉池面有殘花籬邊菊好延陶令坐上詩成戲孟嘉
隨分清歡須酩酊歸時風帽任歌斜

秋日題池南壁間

牢落雙泉一病翁十年憂患掃還空荷稀竹密宜秋雨

戶窄簷低耐颼風
晝日抄書北窗下
有時閒步小橋東
誰知萬水千山外
亦與鄉居興味同

記夢一首

瓊州作

姜山靜凝寺在姚虞二邑之間去予所居纔
十里頃歲閒居每攜子弟或與賓客同游輒
留宿山間今嗣闍黎繼通律師講席學徒常
滿夜坐秉燭翻貝葉率至三鼓予因遣家僕
回致嗣書八月二十三夜夢至其處往年氣

象了然在目枕上成潺字韻一聯興所見也
覺而足成之書以寄嗣知予宿緣或在此山
也

夢魂忽到姜山寺竹徑松門夜不關堂上千燈還閃閃
池中一水自潺潺十年迴悟空心法萬里歸尋葬骨山
歌枕覺來城角動牀頭殘月尚彎環

和郡守喜雨之什

一犁甘澤應虔恭頓覺山川返舊容宿靄釀成千嶂雨

迅雷驚起九淵龍水生洲渚寬溪女潤浹郊原慰老農
衰病不知春過去強持杯酒畧相從

魏子介然甲戌中春不遠數百里訪予寂寞之
濱予方厄窮適此久旱市無魚肉園乏佳蔬介
然處之宴然眷眷不忍捨去予與介然別久介
然氣貌議論益超然孟夏既望慨然請辭欲歸
築室讀未見之書科舉之文不足學走筆作長
句送行且勉使力學志其遠且大者仍用喜雨

詩韻

愛君凜凜有英風刮目相看為改容
榻解久懸延孺子樓登百尺卧元龍
貨因縷積成良賈學務深耕鄙惰農
已約三冬重過我盡攜書史日相從

人日偶得酒果因與客飲成鄙句并紀海外風物之異

燕歸茅屋草芊綿節物方驚海外偏
風掃落花春寂寂雨添幽澗水涓涓
臘醅每謝隣邦餽北果來從賈客船

勝日漫逢聊一笑白頭那問歲時遷

二月三日作真率會遊載酒堂呈坐客

郊外初聞黃栗留仲春風物漸和柔殺雞炊黍成真率
挈榼攜棊得勝遊聊欲勸君終日醉未須悲我十年流
朝來已換輕衫窄酒盡何妨典破裘

路接蓬瀛日景遲塵心消盡忘歸期雨餘荒草侵三徑
風起微瀾皺一池晚色遠涵殘照外春光欲近禁烟時
黃鸝不肯簷間語隔葉相呼過別枝

二月九日北園小集烹茗奕棋抵暮坐客及予
皆霑醉無志一時之勝者今晨枕上偶成鄙句寫
呈逢時使君并坐客

勝日邀朋醉北園森森喬木欲參天更無粉色污尊俎
只有琴聲敵管絃臘酒旋開浮綠蟻春芽初破淪新泉
欲修禊事清明近曲水流觴擬晉賢

七月既望雨後對月招鄰人夜飲不至獨酌成
詩一首以寫一時之景

虹斂江空正寂寥
苦無燈火夜蕭蕭
暮潮和雨歸滄海
華月穿雲上碧霄
沙路微行塵不到
柴門深閉客難招
一杯黎酒還成醉
羈枕時聞犬度橋

秋夜有懷

金爐未冷旋添香
風靜雲開月到廊
何處獨吹西塞曲
無人同醉北牕涼
鱗鴻路隔書難寄
鼓角聲遲夜漸長
明日欲尋真率約
濁醪時許過鄰牆

海南氣候與中州異
羣花皆早發
至春時已盡

獨荷花自三四月開至窮臘與梅菊相接雖花
頭小而香色可愛頃歲蘇端明謫居此郡嘗和
淵明詩其畧云城南有荒池瑣細誰復採幽姿
小芙蕖香色獨未改即此池也今五十餘年池
益增廣臨川陳使君復結屋其上名賓燕堂今
夏得雨遲七月末花方盛開因成此詩約勝日為
採蓮之集云

秋來雨足溢方塘華屋臨流四面涼風颭圓荷翻翠蓋

水涵芳藥艷紅粧淡煙難掩天真色薄日時烘自在香
詩老未須譏瑣細解陪梅菊到冰霜

昨晚約逢時使君今日食後過賓燕淪茗觀蓮
今日雨忽作因記東坡遊西湖遇雨詩云湖光
潏潏晴方好山色空濛雨亦奇之句作雨中觀
蓮詩戲呈并示同行諸君

城南方沼盡栽蓮得雨花開晚更妍自有清芬來靄袂
不須紅粉笑當筵彤霞暈臉深還淺碧蓋跳珠碎復圓

更擬中秋陪燕賞月娥休妬水中仙

移具訪逢時堅白堂

已許攜壺就綺羅却因風雨斷經過不辭美酒十分勸
欲聽佳人一曲歌掌上要觀摩勒果池中難借右軍鵝
近船舶至頗得北果又一鵝甚大且肥將烹之摩勒果見維摩經使君獨醒空回去被
冷燈青客奈何

庚午重九予以憂患經此節物亦強舉杯復
同坐客步至陳氏水閣率爾成韻

累歲嚴亭會衆賓今年九日未全貧樽中有酒須招客

籬外無花免笑人

昌化地熱九日不見菊李太白九日龍山詩云九日龍山飲黃花笑逐臣

竹杖芒鞋行自慣風軒水閣坐來頻鬢邊強把茱萸插
萬里誰嗟老病身

辛未歲旦用蘇子由韻成兩詩寄諸子姪

朋遊族黨死生分老壽今居第二人

予辛酉冬南行城中老朋友如韓似

夫王從道陸元鈞本房兄弟德充舍弟元發堂兄乎松
先民先介之皆物故獨堂兄去華無恙今八十矣

竹飽經炎海瘴柳梅空想越溪春身行九折心無轉息

住三田氣自新白晝漸長牕日暖始知羲馭解停輪

頻把光陰惜寸分十年閱盡世中人衰容暗換圖中象

和氣潛回海底春香裊金爐沉水暖茶烹石鼎乳泉新

僂崖產沉香天慶觀乳泉東坡有賦丹元息息添真火肯使空花翳五輪

目有五輪謂血氣水金腫也見九仙經

吳德永遠寄乾粟五百顆荷其厚意戲作長句

謝之

海山深處住多年容貌雖衰齒尚堅長使玉泉歸絳闕

每留真火暖丹田感君特地貽乾栗知我猶能咬石蓮

土物欲尋香翠報近來行市正增錢

來書言僕筆力不
異往年乃深究仙

經通錄之數因以為戲所
寄栗硬如鐵石煮終不軟

四月望夜郡寮悉赴盛集羊荊華林伯壽伯安

相繼見過同登涌月閣待月成拙詩并呈常往

來諸友

杖藜欲往歎塗窮賴有林廬寓此翁日暮凭欄看涌月
夜涼開牖濯清風浮沉直擬羣鷗鷺冷煖安能效燕鴻

獨酌城南二三子携棋挈榼笑言同

羊荊華敞小軒面叢竹予以細香名之盖用杜
子美風吹細細香之句因賦此詩

負郭林廬帶草堂小亭軒敞對修篁祖師但指青青色
詩老能聞細細香風過戶庭常掩冉雨餘衾枕自清涼
幽蘭茉莉徒芬郁氣味不如君久長

昌化雖窮寂今歲偶諸處寄酒東船至得北果
又老庖自海康來人日與客飲邂逅成醉座中

賦此

去年人日醉陳園竹外風流洗瘴烟花落野桃春寂寂

海南地暖雜花皆臘前開盡

潮回南浦水涓涓臘醅每謝鄰邦使社

果常隨賈客船佳節漫逢聊一笑老庖能鱸海鱸鮮

悼程伯寓尚書

日斷佳城戶一局名山千古返英靈郡祠空復存圖像

公典宣信撫三郡所至有惠愛父老為立生祠

朝路無由認履聲大節已書班

氏筆豐碑應勒退之銘文章不朽傳賢嗣收拾何勞假

六丁

壯節滋培雨露深
衰然文采冠儒林
恩霑二族全純孝

伯寓初為臧氏舅所養登第之後不忍遽歸既升朝叙封而臧氏夫婦繼亡服闋還朝乃自陳歸宗此事古今罕有殆天以全節付公無愧范文正公也
忠貫三朝秉一心
墓木未懸吳札

劍斷弦誰續
伯牙琴傷情
故篋存遺帖
洒淚行間自不禁

八月一日詣新學瞻禮廟像退與客徜徉訪尋
幽勝所至清談淪茗晚至陳氏園亭酌乳泉而

歸一時清集無愧前人主簿趙元弼乃有厄陳
之歎形於篇詠因次其韻兼呈諸友

郊居多與泮宮鄰回首清游迹已陳曳杖入門瞻廟像
穿林度壑訪幽人遠稽鄒魯衣冠古近揖江山氣象新
飲水飯蔬真樂趣始知席上有儒珍

元弼主簿喜飲而客於開閣又累輸棊不償同
僚頗以為言八月朔出郊乃有厄陳之歎因再
次其韻

飛蓋追隨訪隱淪坐中佳客有荀陳貪盃且可偷鄰甕
愛竹何須問主人雨後已看山色爽雲頭漸喜月華新
烹羊載酒邀同社冷落盃盤笑集珍

郡學落成之初八月二十二日陪郡守同來仍
榜郡學二字道勁結密觀者興歎是日燕郡僚
并學職郡守謂予本起諸生俾預燕集因成鄙
句呈逢時坐客

氣清天朗屬中秋黉舍初成燕魯侯依舊規模環壁水

斬新牌榜燦銀鈎青衿士子欣榮遇白髮迂儒預勝遊
尼父道行千載後坐令南海變東周

海外自去冬不雨至今農圃俱病郡侯率僚友
為民祈禱二月十八日祭社致齋是日雨作喜
而成詩呈逢時使君

隨車甘雨應精祈樂歲豐年喜有期草色青青連粟壠
海外俗不種小麥竹聲細細想荷池欣逢山路花開日
惟賴粟以接禾稻

正值田家酒熟時準擬明朝風日好野桃應有未開枝

靈真道人久無詩來用協甫韻并前篇寄之且

拉爾耳翁同賦

道人何處是生涯山遶孤村水繞家
鬢裏雪霜全掃白
胸中梨棗旋開花已乘綠景功初就更服黃精善莫加
若向靜中生妄想還如炎地走冰車

梨棗綠景冰車見真語

林庭植雖已受代勉為感恩之行交印後即浩然歸隱徜徉里巷間以碁自娛樂哉未易得也

因成拙句贈行

乙亥孟秋

歷徧昌江守令權却回小邑作神仙宦游未遂心先淡
歸橐雖空意愈堅濁酒三杯須滿酌枯棋一局要爭先
閒居自得閒中趣更活人間七十年

吏隱堂

有序

贛川陳自厚再領昌化郡符所居堂湫隘不
蠲一洗而新之栽花蒔竹累石為山凜然有
巖壑之趣予為名曰吏隱意欲不妨為吏而
有隱遁之風也并賦長句云

海邦地僻少迎將，心逸身閒白晝長。
賸欲哦詩追沈謝，不求名迹擬龔黃。
旋移松石成雲壑，時引笙簫入醉鄉。
吏散簾垂公事畢，清風一榻傲羲皇。

拙詩奉送厚之權郡還闕

天衢未擬縱驂騑，南顧聊寬聖主憂。
民頌永傳僖耳國，後漢蠻夷傳云海外有僖耳國家聲夙著虎頭州。
簿書脫屣歸華貫，翰墨收功入勝流。
去去願將民疾苦，盡攄膏臆副旁求。

獨居自遣一首寄厚之

平生憂道不憂貧萬里風波一葉身路滑須憑木上座
天寒那用竹夫人閒尋獨鶴為仙友笑指孤雲作近鄰
北客不勞頻問訊已拚終老海南濱

送秦令元發赴吉陽

吉陽雖遠郡其實魚米之鄉泉甘酒美實海
外樂國近年守土者率不能謹三尺遂致紛
紛朝廷察知其弊俾三司選清強官往攝郡
事瓊司以臨臯令秦元發累任海外有廉聲

即以名聞乙亥十月被命南來道由昌江相
從累日喜而成詩以送行云

百里威風已震驚朱幡夾道聳先聲耕桑不擾民歸業
香翠無求吏自清老去方知五馬貴愁來未覺一杯輕
世情冷暖難開口懷抱因君得盡傾

象臺

有序

象臺謝氏所居去郡城六十餘里有溪山之
勝今瓊州司戶洪兄弟四人皆以儒學得名

好賢樂善不求聞達右丞王復道嘗館其家
作扶踈堂等詩戶曹之子傑以幹至昌化數
訪予執禮甚恭若有求而不敢問之盖亦欲
得予詩也念方老病未暇今晨忽來告别無
以酬其意勉作長句送行若亭榭之勝景物
之美尚須異時登覽而賦傑兄弟亦四人皆
預鄉薦有聲場屋云

全家卜築面孱顏
變態煙雲坐卧看
丘壑時應攜妓女

階庭還見產芝蘭
水涵山影千尋碧
路轉松陰十里寒
杖策它年容叩戶
盡驅佳處入毫端

和雨後對月

載酒人無顧
寂寥秋來門巷更蕭蕭
風驅雨脚收千嶂
雲捲月輪升九霄
松竹此時聊谷隱
巾車指日見弓招
登臨莫作殊鄉念
乘興時尋小石橋

海外氣候每歲三四月間已如劇暑
客有自吉陽至者寓館問漢亭累日且言吉陽氣候晝夜如

炊因歎此邦之勝乃知人生無有足時不經熱
惱豈知平日之清涼乎故古之達者每以此對
治釋氏云推落大火坑火坑變成池皮鞋和尚
以為即時清涼也蘇公亦云嶺南瘴毒地有此
江月寒乃知天壤間何人不清安子謫居嶺海
踰十五年見聞習熟不以為異因作此詩以自
慰且以警世之賤丈夫一不快即愁歎怨憤或
譏謗怒罵如柳劉之徒蓋未足以語此也

客自東來說吉陽始知儋耳本清涼潮聲卷海千峰雨
月色侵門滿地霜更欲何方尋佛國此生真欲老蠻鄉
安心守一師吾祖尚覺人間日月長

予生世幾八十年交游士友有昧平生而一見
氣合者有同鄉並舍而終身情乖者因悟笑曰
此釋氏所謂宿緣也知此則可以忘憂惱泯是
非免輪迴而脫生死也因作拙句以道其意云
路隔仙凡只一塵浮生出沒轉風輪宿緣未斷形雖換

異世相逢意自親圓澤再來尋舊伴房公一笑悟前身
若將愛見迷真性萬劫難超未了因

丙子正月二十三日紀事

風捲陰霾日月明鯨鯢已戮海波平姦愴藉手捐奇貨
交友通書免詭名舊俗衣冠嗟化劫新疆兵革偃長城
聖君若用當時將一洗烟塵宇宙清

離陽壽縣百餘里遇大風雨溪流漲溢宿修仁
境小寺新潔可喜不復有滯留之歎偶成長句

老病字畫歌斜輒自笑也仲子孟堅同來

逐客多年住海濱今朝喜作北鄉人
飄風掃地捲煩暑驟雨翻空洗瘴塵
境惡乍離賓館陋眼明欣覩佛祠新
松林竹徑俱幽勝留滯何庸歎苦辛

紹興丙子六月十九日

某到郴幾兩月適當重陽而菊猶未開然江山
清遠又仙佛所居有足樂者因成鄙句以寫離
憂

重陽從古多傷感逐客南來重歎嗟
鏡裏但驚添白髮

樽前猶未見黃花求仙頓覺三山近成佛無令一念差
習氣平生都掃盡更憑橋水洗塵沙

柳士為作暖閣既成是夕雪作喜而成詩

柳士謂柳


戶曹
邢海

暖閣初成荷北鄰歡然一笑欲烘春香煙冉冉縈紆轉
鼻息齁齁出入勻睡美忽驚天曠曉夜寒誰怕脚舒伸
老兵來報雪床厚準擬明朝共飲醇

七言長律

悼程伯寓尚書

人物江東第一流，天衢闊步縱驂騑。
彈冠事主俱青紱，握手論交到白頭。
照世詞華窺賈馬，致君事業擬伊周。
平生自謂孔北海，晚節欲為陳太丘。
危行危言逢有道，一生一死見交遊。
自憐罪大無歸日，哭送松門嘆莫由。



欽定四庫全書

集部

莊簡集卷六

七

詳校官庶吉士

臣

翁樹培

侍讀臣孫球覆勘

謄錄監生

臣

嵇承羣

謄錄監生

臣

張曾壇

欽定四庫全書

莊簡集卷六

宋 李光 撰

五言絕句

次韻奉酬當時參議見贈遊鍾山五詩

二水蒼茫外，千峯杳靄間。
傷心金碧地，舉目異河山。
英謀參上幕，爽氣蓋羣雄。
憤世仍憂國，都忘酒醕中。
六國衣冠盛，中原氣象存。
腰間佩金印，莫忘殺王敦。
雅志希三釜，平生擅一丘。
歸尋赤松約，何必更封留。

塞北烟塵息江南勝氣多君王總戎旅來繼大風歌

跋六無詩卷後

六無信筆成無令浪流傳它時達官知人人願南遷

脩仁道中微雨峭寒荒山古道間桃花盛開因

偶成小詩

古道逢元夕荒山慘暮烟桃花雖作意未是豔陽天

正時

月十四日

丁丑歲冬夜發家書二首

一別關山隔相逢未有期書來知勿藥歡喜偶成詩
越國今安在湖邊想舊居衡陽空有鴈不寄一行書

七言絕句

三月六日聞五馬同郡僚出郊勸農

遙聞鼓吹出城闌露冕褰帷意在民父老莫疑頻駐馬
使君那顧採桑人

旋移瑶席盍朋簪日暮行庖簇柳陰力勸耕農頌漢詔
應知聖主愛民心

病中作

一枕昏昏若醉鄉
雲收霧散月臨牕
幽人睡足自驚覺
雲在青天月在床

池外紅蕉

雨後芭蕉粲曉霞
近如相妬遠如誇
臨池似把菱花照
隔葉深將翠幔遮

立夏日納涼

茅菴西畔小池東
烏鵲藏身柳影中
沙岸山坡無野店

不知此處有清風

五月八日雨大作聞守倅遊湖以前日白蓮見
寄戲成小詩謝之

守倅風流好事同笙歌都在雨聲中似知坐上多狂客
不許佳人酒面紅

老欽闕黎以政和七年九月十七日夜圓寂跏
坐如生道歎仰邑丞向仁叔作偈讚悼因次
其韻

鍊得金剛一性堅形如枯木尚凝然莫疑台嶺慈燈息
薪盡何妨火自傳

老人端悟上乘禪夜壑藏舟已脫然認得本來無一物
不將三觀浪流傳

寄天童覺老

竹牖茅簷屋數間不貪杯酒不遊山征租納罷秋田熟
未必天童似我閒

贈趙與檣

歲歲天寒白鶴來
篋中舊藁為君開
漁伊一脈微如綫
力踐精思漸可回

竹几

虛滑輕涼任自然
水邊林下最相便
他年若遇青城叟
成壞方知盡屬天

青城叟見
費孝先事

洞下宗風冷秋初地而近時了覺二老化行淮
甸今復盛于閩浙學徒常千餘人予固疑之昨
天童訪予于五松山交臂立談之頃疑情頓釋

因成偈四句奉呈大衆一笑可也

一條枯木如青蓋古廟香爐散紫煙
百鳥却銜花作供
恁時方會祖師禪

雙雁道中

晚潮落盡水涓涓柳老秋齊過禁煙
十里人家鷄犬靜
竹扉斜掩護蠶眠

送春

層樓極目送春回愁裏勿勿把一杯
更有明年尋舊約

先驅還到北枝梅

羣花落盡柳綿飛
陌上遊人去漸稀
今日江津送春去
明年還向柳梢歸

友人惠鵝僕方戒殺贈二小詩還之

曉隨蘆鴈聚寒汀
只有崇師畫得成
欲付庖人應未忍
憐渠豈是不能鳴

右軍池上動成羣
何事羈棲傍主人
放汝江湖須遠去
莫隨鷄鶩惱比隣

留春

紅蕉開盡槿花飛
載酒登臨到落暉
秉燭更期尋勝侶
不教容易放春歸

白蓮

白色蓮花也
自奇亭亭水面半開時
恰如西子新粧了
未把胭脂污玉肌

跋胡機宜畫卷

吳山越嶠對橫斜
清夢時時到外沙
行過小橋墮落靜

定知深處是吾家

戲成寄介然先輩

鳴鳩隔屋報新晴
小閣幽牕分外明
怪底女僮來滌硯
無人知是和詩成

政和戊戌孟夏補試文武遣興一首

一簾疎雨鎖牢愁
小閣幽軒得暫留
漫說金甌能破睡
不如玉局解消憂

新橋

賈客船回泊暮潮夜涼乘月卧吹簫兩堤更擬栽垂柳
掩映荆溪菴畫橋

浯溪

結屋浯溪最上頭冰輪灩灩水悠悠夜深燕坐觀心境
月到中天江自流

自象登舟入武僊縣境有山聳拔四十丈奇秀
異常有道人於此昇僊因以得名

青山萬疊俯連漪時有幽花掛石衣百里清溪休蕩槩

要看倒影入牕扉

陽朔道中兩絕

北客多誇陽朔山今朝了了見層巒
定知萬壑千岩勝不似山陰道上看

萬里南行豈偶然黃梁一枕夢邯鄲
初無惠政蘇疲俗父老休迎舊長官

覽義叟秋香二首詞情悽惋使人感嘆
義叟新有閨房之戚因戲續其韻且知予感念故人不

忘之意

小詩清絕與招魂香霧依然濕鬢雲一夜狂風都掃盡

鼻端無復嗅餘芬

離摩經云如入薝蔔林不嗅餘香

冷艷孤芳孰與儔此花飄盡更非秋
嶺頭賴有寒梅在
接續幽香入品流

次韻補之藥名十絕

前五絕自謂
後五絕寄贈

一樽聊對菊花前獨上危樓晚景天
風外笛聲聞續斷
海桐搖落夜敲磚

婆娑終日步蓮塘
雲點空青月到廊
病渴長卿初賦就
伏神東壁漏聲長

平昔雌黃憫聖丘
預知鈎吻卒難收
狼牙狗舌須防已
擬向前湖覓敗舟

百部披尋手不停
腸留藁本味精英
林泉甘遂高良性
石斛何如五斗輕

堦前一葉巧隨風
夜半金莖沆瀣濃
白兔西飛如赤箭
烏頭旋復向龍鍾

面壁潛心學大空此身無患任飄蓬
草堂自得醍醐味更訪稽山支遁翁

山城衢陌厭塵泥獨掃雲房價不低
早晚天門自開闔不須鷄舌決明啼

纔過天社又中秋江子何時寫我憂
風掃半天河海淨玄霜著物蛻蟬休

草堂誰緝敗蒲編笑傲松蘿不記年
應喜秋來甘澤瀉牽牛時復自蹊田

却上南亭望北亭雲生秋石逼簾旌露欺綠玉青蒲色
風擲琅玕敗葉聲

次韻補之惜花詩

年來直欲挽韶華柳徑桃蹊便是家綵錦幕天防橫雨
紅紗照夜看飛花

詠史

項羽不聽韓生之謀背關懷楚亡徵已見漢
王卒用張良計致齊王信等會垓下

入關不守舊山河漢用張良作網羅垓下不知兵已合
夜深方訝楚人多

紀異

掣電驅雷起蟄龍一番桃李鬪纖穠晚來忽見千山白
戲蚓鳴蛙失舊蹤

贈林桂高

子向柯山得所從天寒濱海致詩筒卷中更睹忠齋筆
力障狂瀾有二公

知入廬山翠幾重歸除懷玉不匆匆絕憐楸枰雙雛鳳
長記關中一禿翁

退朝見越山二首

曉來朝退紫宸班馬上悠然見越山便欲掛冠尋舊隱
卧看遠岫列牕間

接武鴛鴦綴近班愧無謀畧濟時艱打包結伴尋方去
相對僧牕一味閒

題百官步

曉雨微茫水接天
隔江茅店有炊烟
杖藜獨上沙頭路
猶記當時趕渡船

失題

別乘風流邁昔賢
澄江堂下勝栽蓮
秋來更有江湖思
睡鴨殘蘆帶暝煙

賀監門前水一灣
藕花十里對梅山
歸心不待秋風急
恐負輕鷗作伴閒

紹興二年三月還自淮西重至宣城與德淵寺

巫諸友散步後圃登雙溪樓

翛然危觀出風塵千里溪山照映人飛蓋追隨賓客舊
滿園桃李不勝春

夙街王命出行朝軍士無譁罷擊刁一笑關頭發三箭
却驅貔虎取天驕

赴金陵舟過雪川偶作

孤村遠浦接微茫處處經行看揜袂却憶年時住家處
藕花無數遶林塘

漁舟蕩漾逐鷗輕
嘔軋縑車雜櫓聲
却入江淮兵草地
夢魂何似此間清

宿伯氏南軒

江山秀色照窓扉
暖閣清簷許暫依
白首往來寒食路
扁舟長趁落潮歸

孚先兄示詩頗懷憤悵且有杜門不出之誓連
日病目不能答今小愈因成三絕句奉寄以廣
其意

荆玉靈珠祇自珍
開門覓句未全貧
先生不出人難測
應有清風動四鄰

發憤潛心正下帷
一經傳授寧馨兒
三間茅屋真堪隱
十畝荒園未暇窺

雲出無心鳥倦歸
李鷹當日最知機
心空一任他人謗
道在何妨舉世非

即事

野性閒心不可羈
歸來況復故人稀
三杯自可頻招隱

一局何妨小合圍

元日

逕脫東風入律新
翠華移蹕東巡中
原父老應遮道
要看君王玉座春

元發弟携家避水於迎山閣且賦二小詩寄諸
子勉次其韻

襁負蒼皇冒雨來
烹茶煮石暫相偎
南山況值秋天寒
卯酒時時自一杯

忽驚落日轉東隅人意欣欣似躍魚
泛宅同來真不惡
幾家回首歎樓居

枕上

曉日烘窗度隙塵朝來光景屬閒人
有時被煖貪濃睡
客到門前且莫嗔

水際看雲

曾陪鴛鴦綴清班拂袖歸來水石間
策杖岸巾聊徙倚
孤雲何似此身閒

過上方一絕

芒鞋筇杖強躋攀，示病維摩畫掩關。
棊罷不知風破雨，却攜爐鉞過前山。

再題百官步

茅舍荆扉尚宛然，重來白首記當年。
幾回倚杖沙頭路，獨立蒼茫喚渡船。

鷄

纓冠飽穀更知時，振羽階除自在啼。
驚斷幽牕五更夢。

北風穿戶月沉西

夜宿東城有懷

風送孤帆掠岸飛
籃輿十里漫追隨
夜深小市無燈火
雪月佳哉祇自知

半生香火庇琳宮
自怪年來出處同
憂患祇今嘗已徧
頽然相對兩衰翁

次韻得之惠笋

南山老竹引鞭長
採掇新萌綠玉香
已覺年來忘肉味

小鐫深煑與君嘗

雨中承厲吉老送芍藥色微黃者尤奇戲成二

小詩為謝

殘紅賸紫輾車塵雨浥豐肌浴太真老眼年來超色界
定應辜負一枝春

勝韻幽香敢自珍靜中風味見天真亂紅千點飄零盡
留得奇葩殿晚春

遊石橋三絕

要觀台嶺百千燈雲水飄然愧衲僧且寄此身江海上
不辭千里旋敲冰

此身游走半塵寰贏得顏衰兩鬢斑要是胸中未豪壯
重來海際看濤山

海上羣鷗了不驚山中草木漫知名祇應門外蒼頑石
猶記幽人曳杖聲

游大龍湫觀瀑亭遇小雨成詠

十里蒼崖轉碧空出山雲雨細濛濛只因便是龍湫瀑

濺沫飛流逐晚風

過小江渡行村落間愛其風土偶成

未到清溪水半渾山圍蓮蕩鷺成群
槿籬竹塢疑無路
鷄犬時時隔岸聞

入雁蕩山

夢想清游覺又非十年雲水與心違
名山今屬分符客
不羨凌空振錫飛

丁巳十二月二十六日過吾村早飯宿後溪

永嘉氣溫圖經謂四時皆溫因以得名予守
郡二年未嘗見積雪自行衢婺連見三白

梅蘂凌寒雪未消青帘紅旂巧相招十年不踏江山路
過盡吾村獨木橋

出處平生豈有心心憂時事力難任飽看鴈蕩佳山水
却入江西劔戟林

過盡關山到水村衾裯猶訝四時溫朔風凜凜催飛雪
似與幽人洗瘴痕

過亡妹墳有感

死生契濶不堪論
鴻鴈驚飛只斷魂
白首重來作寒食
數行老淚灑松根

離天姥五里入石橋路

江湖方喜脫風波
嶺路還驚上下坡
賴自隨身有竿木
南來未怕石頭多

過豐城

匣藏千古祕潛虬
夜吐光芒犯斗牛
欲把精鋼付陶冶

散為和氣滿田疇

予與天台才上座相別踰二十年惠然抱琴見
訪老懶日困朱墨度不能款戲贈小詩

當時指法香難尋二十年來枉用心却抱孤桐林下去
青山流水自知音

予去開化三十年戊午仲冬自江西召還道
由江山境感嘆成小詩

依然山色與溪聲歲月崢嶸祇自驚獨有老農能耐久

全宋文卷六
路傍猶說長官清

過清江寄向伯恭

清江已在煙城外
碧瓦珠簾隔斷橋
不見薌林真面目
霜花風葉暮蕭蕭

再寄向伯恭

南行萬里敢辭遙
過盡江西獨木橋
已見薌林真面目
依然華髮兩蕭蕭

惜春

羣紅飄盡綠陰濃
醉裏看花若夢中
籬外野桃如有意
為予回首畧從容

哀年那復惜流芳
自愛春深晝景長
老眼不愁花落盡
移尊來傍綠陰涼

離萍鄉晚宿里田鋪

曉出萍鄉動越吟
清溪無底亂山深
頽垣破屋郵亭古
面壁聊觀去住心

將江對雨

急雨崩騰會百川
牂牁江露石如拳
兩山南北人來往
笑看縱橫小渡船

牂江晚眺

瘴雲消盡日
街山風動疎簾
眼界寬
試著胡床臨水坐
要看金塔湧澄瀾

元發弟六十五姪遠寄貂蟬筆樣孟博有詩因
次韻

十年慣使鷄翎筆
一束貂蟬愧暗投
待我明牕草玄罷

論功應合便封侯

僕解易已畢

李子從家觀李成所畫吳越山水圖

朝來陡覺瘴塵空
遠浦平林杳靄中
異境掇移消底力
筆端聊舉一針鋒

玻璃盃

僕之謫居澄江也
吳元預適寓水東
時時往來忽一日
告別仍以玻璃盃
見贈意則厚矣
然僕方宴坐一室
空諸所有日食不
過飯一

孟爾間或散策郊外遇田夫野叟飲輒醉倒
何用是寶器哉因戲成小詩復還其盃

獨醒難招楚些魂時從蜚叟醉蠻村興來不假玻璃盃
自有隨身老瓦盆

九月二十八日枕上

年來心氣苦怔忡永夜長憂百慮攻賴是床頭有清聖
一杯扶到五更鐘

趙丞相過藤州相從累日因言在朝與諸史官

會話論修史事恐它時不免南行坐有一士云
若有此某當從行今日到此音問也不通退作

小詩

平時盡道相隨去度嶺何曾見一人賴是隨身有孤影
燈前月下却相親

朱致祥教諭飲酒奕棋與僕畧相上下不見旬
日作二詩招之

終日沉機喜欲迷一枰勝負未全低
清秋九月江頭路

不見門前瘦馬嘶

老罷無人斷送秋
惟憑一酌散千憂
莫嫌白酒難成醉
尚有黃花插滿頭

離容南百里間
多古松
偃仆道上不免斧斤之患
感之作小詩呈陸川邑官使稍禁戢之

百年斤斧避龍鱗
尚被樵夫斫作薪
三伏修塗多暍死
清陰留取庇行人

乙丑二月予赴貶瓊山蘇令辨自蔚平追路至

陸川訪別臨行作兩小詩

墟落相逢一笑迎
旋沽濁酒得深傾
明朝轉首俱千里
君到藤江我到瓊

淹留客館雨冥冥
烽火仍連近賊營
已悟去來生死夢
年來愈覺一身輕

欽定四庫全書

莊簡集卷七

宋 李光 撰

七言絕句

渡海

三載藤江守藥爐身輕那復羨飛鳧
瓊山萬里乘風便始覺驚濤異坦途

出處從今莫問天南來跨海豈徒然
須知魯叟乘桴興未似商巖濟巨川

潮回齊唱發船歌
杳渺風帆去若梭
可是胸中未豪壯
更來滄海看鯨波

雷化多曠野道傍常聞鷓鴣聲

已過梅嶺更南征
渺渺瓊山四百程

自雷渡海南四百里

日暖風

和寒食路行人
休聽鷓鴣聲

俗訛其聲曰行不得

乙丑生朝

今朝生日豈須論
老去難酬父母恩
惟有海南香一瓣
直教薰炙徧乾坤

次韻徐念道瓊臺泂酌亭兩絕

笙簫杳渺鶴徘徊
羸女時應下玉臺
莫問三山在何許
更尋方丈與蓬萊

蘓公陳迹半成空
杖策經行紹聖中
便與佳名還泂酌

曄然光景照無窮

泂酌亭瓊臺在海南孤絕之處限以
鯨波而風物蕭然若在塵外疑即三

山之一也東坡先生紹聖間往來瓊山獨飲
雙泉因作亭其上名曰泂酌亭且留詩云

即事十二首

秋雲漠漠日昏昏
積潦連江隔遠村
賴是陳編有餘味

斷無車馬到衡門

青鞋踏徧海邊沙
葉暗檳榔樹樹花
蜚子也能留客坐
旋添活火待煎茶

榕葉陰陰日向西
翠禽無語畫簾垂
晚涼庭院經行好
洗出蕉花一兩枝

橋南橋北水漫漫
河酌依然碧玉寒
隣里何妨頻汲取
莫教摧折小欄干

家僮投晚閉柴荆
倚錫聊同結夏僧
夜漏欲傳城上鼓

籠紗初點佛前燈

客舍生涯自寂寥
秋來仍復雨連宵
前村隱隱人來往
時有篝燈過竹橋

過却東橋即是村
浣紗人出閨紛紛
倚筇爭向前灘望
漲水潮來減幾分

異域游從見面疎
掩關終日自端居
正須文字相料理
病眼常嫌細字書

涉旬風浪戰扶胥
咫尺烟波信息疎
見說北船今日到

故人應有寄來書

南隣小魏隔雲巢
里巷相從近結交
聞道秋來作文賦
可能借我一齊抄

鯨波萬里海南州
郭外新居事事幽
一味清泉堪淪茗
千年蠹簡可忘憂

潮平賈客輸蠻貨
日晚隣翁約勝遊
月黑無人來打水
喧呼長怕五更頭

與善借示魯直集雕刻雖精而非老眼所便戲

成小詩還之

牆角年來棄短檠，捐書默坐眼方明。知君欲嗣江西派，

淨几明窓付後生。

近日呂居仁舍人作江西宗派序以魯直為宗主也

連夕大寒示隣士

凍雲垂地北風顛，粧點江湖欲雪天。我亦隨身有蓑笠，

興來同上釣魚船。

紙帳蒲團度厄年，一菴聊可寄深禪。隔窓要聽芭蕉雨，

襆被須來對榻眠。

重過橫河宿莫氏南軒

扁舟重過海邊村
野竹侵堦柳映門
相對小窻賓客散
十年憂患不須論

庭植惠雪菊嚴冬盛開

冷豔霜苞向日舒
移將小檻近階除
應知海外冬無雪
留與寒儒夜映書

十二月寒甚小雨打窻有霰雪聲成小詩招隣
士飲

行窮海北到瓊山二月猶驚塞外寒
小雨洒窻風浙瀝擁爐來聽雪聲乾

予自暮春與客燕野趣亭俛仰三時始復再至
則花木益茂亭亦稍葺矣因思去歲重九之集
覽物增慨題三小詩

經時不到嚴家館千樹檳榔一徑深
莫把小亭頻展拓恐妨幽步綠苔侵

秋容野色擁簾旌森木中間結小亭
斫盡枯荷露清淺

夜深來看一池星

聯騎同來倒載還勝游那復羨龍山空餘把酒題詩地
忍對籬邊菊藥斑

戲題林庭植茅亭

十畝茅亭倚壁開中安五寸黑香臺小窓容膝頻招客

呼出丁香佐一杯

時丁香
盛開

次韻趙丞相海鳴

幽人一枕夢魂清風鼓寒潮夜有聲海色天容本澄靜

年來應為不平鳴

身如一葉任風飄
閉眼觀心路
匪遙慣聽海鳴
還熟寢
未妨歸夢趁回潮

三月三日陪郡守宴嚴亭

旌旆悠悠照暮春
蘭亭修禊在斯晨
不須縣尹前驅去

自有隨車雨洗塵

坐間
得雨

尋花問柳到村扉
葉暗檳榔晝影移
從此山翁頻倒載
嚴池今勝習家池

癸亥上元余謫藤江是時初開樂禁人意欣欣
吳元預作紀事二絕頗入風雅戲和其韻

曾見端門萬炬燈天街追逐少年行如今老病惟貪睡
懶向州衙看樂棚

再聞韶樂共欣然太守推行詔墨鮮山郡莫嫌娼女拙
嫁他蚤戶已多年

次韻康守通幽亭三絕

簣簣脫籜已穿林裊露搓烟蘚徑深宴坐蒲團空寂處

一聲啼鳥故相侵

風捲千梢偃旆旌杖藜徐步到幽亭他年持節重遊地
父老爭看舊使星

吏散庭空絕往還焚香默坐似居山新詩改罷重搔首
自拾堦前筍籜斑

端居無以遣興偶成三小詩仍用前韻呈元壽
會元二公

枕櫛澀勒易成林午枕蕭然一榻深春半已無桃杏在

夜深惟有月華侵

搖搖北望動心旌
老病聊依洄酌亭
時有小兵來滌硯
清泉一掬冷涵星

流轉南來未放還
此身忽到海中山
臨池顧影聊娛戲
懶把青銅照鬢斑

十月二十二日縱步至教諭謝君所居愛其幽
勝而庭植道源諸友見尋烹茗奕棊小酌而歸
因成二絕句

城隅詰曲趣溪斜遙望青帘認酒家行過小橋沙路盡
忽逢茁茁一池花

歸來庭院欲棲鴉冷落誰憐副使家獨向小園行欲遍
籬邊黃菊有殘花

十月三十天氣重陰門巷蕭然乏酒不能招客
隣人釀酒適熟而梁軍判周主簿芋學錄不約
而至洗盞更酌喜而成詩以示坐客

火冷燈青正寂寥夜寒風勁酒香飄隔牆知是隣醅熟

踏雨沾泥不待招

昨以酒熟隣士皆來戲作小詩而國幹和章獨
未至今日天氣溫和再成鄙句促之

朝來風靜凍雲消簾靜窓明瓦不飄鴉叫三聲乾鵲喜

南人諺云鴉叫三聲
酒食不停魏介然云故應知我有嘉招

星河湛湛夜寥寥閉戶微聞麝篆飄況有南隣愛酒伴
興來不假楚辭招

五月望日市無魚肉老庖撾園蔬雜以杞菊作

羹氣味甚珍戲成小詩適梁軍判送酒頭來并
成三絕謝之

旋擷園蔬二寸長牙齧脆響菊苗香欲招隣友同來啜

恐被鷄豚越短牆

小說有郡守攜具訪一山人是夕
寤驚云誰令羊羣踐我菜園也

疎簾冉冉度茶香日午誰陪竹戶涼陋巷簞瓢已清絕
更將詩句攪空腸

麴米新筍只隔牆西風吹過酒頭香故知王母憐愁獨

煩送瑤池九醞觴

國幹
送酒

新年雜興十首

春潮和雨沒平沙
沙岸疎籬盡酒家
北客慣尋寒食路
不知人日已無花

海邦人日似深春
籬外桃花半不存
自要杖藜閒信步
蹇驢牽去繫榕根

紅蕉欄畔小池塘
山雨添花映短牆
自是冰霜元不到
浮花那解傲冰霜

獨酌怡然萬慮平
夕陽窻牖喜新晴
矮牀睡穩誰呼覺

只有幽禽一兩聲

世事悠悠委逝波六年歸夢寄南柯
北來莫怪音書斷衡嶽元無雁字過

信是閒中日月遲
頽然那惜寸陰移
消磨永晝非無術
袖手旁觀數局棋

蕭然一榻本無塵
轉物庵中老病身
江上桃花空記面
不如啼鳥解留春

負郭幽居一味清
殘花寂寂水泠泠
夜深宴坐無燈火

捲起疎簾月滿庭

佳節無人共一尊
熒熒燈火雨昏昏
憑誰與喚烟霞伴

直上羅浮看上元

去國頻經曠蕩恩
新年猶寄海南村
掇移妙境非難事

直使心超不二門

秋日雜詠十首

三載幽棲養性靈
焚香默坐萬緣輕
空庭野草萋萋碧
更覺秋來少送迎

抄罷唐詩筆暫停不將奇字問添丁
郊垌秋半無炎暑
淨拂明窓讀道經

風露蕭蕭月欲沈方池水靜影橫參
何人睡覺來陪我
更取金荷潑灑斟

八月十四
夜四鼓

招呼佳侶暫忘形夜久金莖露欲零
風捲晴雲時點綴
未妨華月上青冥

中秋招隣
士小酌

海濱三度過中秋雨橫無因到庾樓
萬里無塵今夕月
不須攜客上羅浮

沙路微行到懶窠晚風斜日滿烟蘿焚香坐久疑無路

忽見帆檣竹外過

道人了然卓
卷號懶窠

杖策尋幽路欲迷華髮椎髻雜生黎空階秋晚無霜葉
自把清詩竹上題

老去忘情不厭閒酒杯詩軸最相關籬邊知是重陽近
萸實微紅菊藥斑

天南誰把尺書傳老眼經秋自不眠鼓角聲回窓未掩
可堪殘月到牀前

可笑餘生習氣纏時時吟詠偶盈編心閒身老趨平淡
不是新來效樂天

贈傳神陳生

直綴還縮岸幅巾三年海外見來頻鬢髯若為添霜雪
始覺衰容更逼真

列之告別為之悵然小詩送別

小橋西巷每徜徉忽起南風返故鄉旋汲雙泉烹日鑄
從今誰共北窓涼

小詩送孟堅北歸

汝到家中暫喜歡倚門慈母問平安舉頭便見天邊月
莫作千山萬水看

己巳二月三日晚食罷步至林氏園了然道人
新築小亭愛其間寂獨坐久之白上人來出門
又逢魏子歸而寫之以詩偶翻舊藁見之恍然
因書以示庭植

新築茅亭澀勒間蒲團坐久欲忘還道人應供歸來晚

只有野僧相伴閒

夕照穿林暮靄收出門忽見月如鉤幽人曳杖來尋伴
一笑能令萬慮休

書尾寄六十五姪孟容

轉物庵中一老人十年嶺嶠且藏身
黎山萬疊波千頃
心鏡孤圓月一輪

雙泉亭

予自甲子春再貶瓊山寓居雙泉首尾六載

稍葺治之結亭泉上甃以青石可百年南遊
昌化留小詩亭中

甃石流溝汲愈新秋無落葉早無塵他年莫忘癡頑老
曾是雙泉舊主人

陳氏面北小亭遠依林壑下瞰長江主人每醉
卧其下歎羨不足戲留小詩云

赫日曉林起瘴烟小亭風景獨蕭然門前剝啄須輕手
窓下幽人正醉眠

十一月二十八日陳令分寄梅花數枝為賦兩

絕句

幽香偏許夜深聞
冷蘂從來水外村
南地恨無霜雪伴
獨將孤影照黃昏

一枝淡靜玉無痕
便覺蕭娘氣味村
旋汲清泉滋蓓蕾
小窻留待月微昏

二子繼韻復賦二首

香超蓓蕾斷知聞
窮臘開花處處村
應笑多姿桃杏俗

更嫌貪睡海棠昏

城上胡笳枕上聞却愁羌笛起孤村冰容不入丹青手

玉骨那憂瘴霧昏

文昌陳令寄龍眼甚富

不羨蒲萄馬乳寒品流須着荔支間幽人頗覺空囊富
合浦明珠一夜還

儋耳病起偶題

病骨支離睡半醒雨餘芳草入簾青焚香隱几無人到

讀盡黃庭一卷經

黎人二首

褰帷露冕更停輪
渺渺旌麾入瘴雲
異境盡憑詩寫去
郡僚爭喜得新聞

枕椰林裏便為家
白首那曾識使華
莫說蠻村與黎洞
郡人觀覩亦咨嗟

春日偶題

庵後疎籬蔓碧花
庵前榕葉晚藏鴉
階前草長苔痕滿

裝出儋州副使家

海外實未嘗見梅為賦一絕

春日追遊載酒堂名園疑有野梅芳籬邊水畔無尋處
只向風前認暗香

德舉予巾角友生也書來寄三小詩并示杜門
圓妙方指趣深遠因次韻為謝仍寄出門散方

亦反招隱之義也兼示商叟一笑

出門散
方別見

杜門一法有深機勝把玄關叩祖師覆罷忘憂還獨酌

免陪歌酒免論碁

老野狐

瓊士吳志寧居城之東北隅深居簡出若素
隱者已而來儋耳託言學易且云願見異人
予始甚嘉之已而乃聞與一老婦遊一日坐
間為陳守所詰慚沮不自安夜半挈之而遁
戲作此詩欲追寄之不及

變化形容似老儒南來權作白髭鬚祗應坐上無鷹犬

走作人間老野狐

中春之初與諸友遊黎氏園荆華贈予桃花一

枝歸置瓶中連日不凋因成兩絕示同行且令

同賦

枕椰林裏見桃花正似羅幃翠幕遮老去已無簾幕夢
淨瓶歸插一枝斜

竹外籬邊映柳條一枝纖軟更妖嬈似知摩詰愁無伴
留向書窓不忍凋

庖人宋奕請告往瓊般家怪久不至聞已設厨
矣戲贈朱推

市無魚肉爨無烟晨起齋厨每索然欲識先生真樂地
飯蔬飲水曲肱眠

感松

海外獨昌化宜松父老云往年自報恩寺西
行皆松柏林也州縣無禁約邦人折以為
薪根節堅潤者以為明今惟十里外尚有之

三十年後無復種矣感之作三小詩題之寺

殿柱中以勸郡人有知者庶其少弭乎

瑟瑟聲微冉冉香炎天瘴海變清涼從今莫遣兒童斫
留取濃陰庇一方

根盤厚地幹參天護養龍髯幾百年忍把斧斤頻剪伐
坐令鱗甲化非烟

每憶西湖九里松眼明忽見紫髯翁隱居庭院多栽種

為愛笙簫遞晚風

陶隱居喜聽吹笙特愛松風庭
院皆植松每聞其響欣然為樂

昌化肉不常得予蔬食已慣每聞有豬則召一
二友生同飯月不過二三四月二日聞有豬亟
令召三職事

顏樂簞瓢孔飯蔬先生休歎食無魚小兵知我須招客
市上今晨報有豬

予三貶而至儋耳又復二年平生習氣掃除殆
盡海外去國萬里士民不知朝廷事免議朝政
惟是里巷之間是非曲直偶及之于耳中有

如穢物置之寶器自今客至惟經史禪悅道家
養生之說乃所樂聞其餘非已所預者可付之
一默并成小詩以述已意云

庵中宴坐戶長扃鼓瑟吟詩樂性靈客至不妨談道妙
儒書釋典及仙經

戊辰冬與隣士縱步至吳由道書會所課諸生
作梅花詩以先字為韻戲成一絕句後三年由
道來昌化索前作復次韻三首并前詩贈之

冰容幽勝肯爭妍獨樹亭亭近水邊不但色香俱第一
品流宜占百花先

清影扶疎晚更妍每教移植小池邊一枝獨守凌寒操
肯與羣花較後先

月娥姑射妬清妍白髮羞將插鬢邊冷艷獨排殘臘破
孤芳長占小桃先

陳渭老今夕開閣誠為盛事戲成二小詩以侑
坐客

釀成春甕勝玻璃旋壓真珠味更奇飲客莫辭今夕醉
黃河清後卒無期

長堤楊柳映門垂南北行人認酒旗坐上飲流須強醉
休將河水較醇醪

行潘峒諸村愛其巖壑之勝田疇之美因成小
詩

烟市雲中自一墟幽花夾道路紫紆無人與寫巖巒勝

聊展營丘半幅圖

予離藤日李子
從忠李成山水

村落家家社酒香
雜花開盡綠陰涼
山畦是處田疇美
時有歸牛待夕陽

元發惠鳴鷄

塵榻昏昏睡未醒
床頭腦膊老鷄聲
年來學道多晨起
免聽城頭畫角清

朱冠玄臆氣橫秋
得食相呼飽即休
語默從來有程度
不妨風雨夜飈飈

客惠予早鳴晚鳴二鷄各賦一絕

遠和城頭角調清隣鷄寂默尚無聲幽人底事偏嫌汝

驚斷歸鄉夢不成

早鳴

長庚東出月沉西飽粟貪眠尚穩棲却笑城烏自多事

更籌未急已先啼

晚鳴

反舌

喧喧木杪弄新晴羈枕驚回夢不成任是舌端能百轉
園林春盡寂無聲

謝文孺寄三接丹岐伯言人各有百二十歲之

壽其多夭折者聲色害之也如醉後入房等三
事皆促壽命之目予來年八十若服此得終其
天年道人之遺也

三接靈丹古所傳扶危起死勝神仙衰顏全藉刀圭力
少駐人間四十年

予謫海外久矣蒙恩徙榔所寓適與蘓仙隣暇
日攜兒徜徉歷覽遺集因閱本傳不載致仙之
因特以事母盡孝行耳自古仙真得道如吳真

人之流未有不由此而致者世人不知出此多
棄遺父母入深山窮谷中父母凍餓不卹也以
此求道去仙遠矣因成二小詩題之壁間庶亦
少警欲學道而忘其親者

打包行脚為尋真偶與蘓仙作近隣萬里移來今有伴
叩門時許訪幽人

不須辛苦學神仙九轉功成亦偶然但向閨門躬孝行
會須白日上青天

題義柳傳神贊

平生疾惡不量力指佞擊姦期屏迹流落南荒二十年
更無一點烟塵色

詩餘

李公伯紀寄示水調一闋詠歎李太白詞采秀

發然予於太白竊有恨焉因以淵明為答

水調歌頭

元亮賦歸去富貴比浮雲常於閒裏端的認得主和賓
肯羨當年軒冕時引壺觴獨酌一笑落冠巾園圃日成

趣桃李幾番春
揖清風追往躅事如新
遺編諷詠歛
衽千載友斯人
君愛謫仙風調我恨樓船迫
脅終汙永
王璘何似北窓下
寂寞可棲神

清明俯近感嘆偶成寄子賤舍人

前調

自笑客行久
新火起新烟
園林春半風
煖花落柳飛綿
坐想稽山佳處
賀老門前湖水
歌側釣魚船
何事成淹
泊流轉海南邊
水中影鏡中像
漫漫留連此心
未往羸
得憂患苦相纏
行盡荒烟蠻瘴
深入維那境界
參透祖

師禪宴坐超三際瀟洒任吾年

昌化郡長橋詞

昌化郡城之北長橋跨江風月之夕氣象甚
勝庚午八月望夜士友悉赴郡會杖策獨遊
頗懷平生故人作水調歌以自釋予自長年
粗聞養生之說放逐以來又得司馬子微叙
王屋山清虛洞所刻坐忘論一篇因得專意
宴坐心息相依雖不敢仰希喬松之壽度未

即死庶有會合之期

前調

獨步長橋上今夕是中秋羣黎怪我何事流轉古儋州
風定潮平如練雲散月明如畫孤興在扁舟笑盡一杯
酒水調雜蠻謳少年場金蘭契盡白頭相望萬里悲
我已十年流晚過玉霄仙子授我王屋竒書歸路指
蓬丘不用乘風御八極可神遊

過桐江經嚴瀨慨然有感予方力丐宮祠有終
焉之志因和致道水調歌頭呈子我行簡

兵氣暗吳楚江漢久淒涼當年俊傑安在酌酒酹嚴光
南顧豺狼吞噬北望中原板蕩矯首訊穹蒼歸去謝賓
友客路飽風霜閉柴扉窺千載考三皇蘭亭勝處依
舊流水遶修篁傍有湖光千頃時泛扁舟一葉嘯傲水
雲鄉寄語騎鯨客何事返南荒

重九日宴瓊臺

南歌子

佳節多離恨難逢笑口開使君攜客上層臺不用籬邊
凝望白衣來且看花經眼休辭酒滿杯玉人低唱管

絃催歸去瑣窓無夢月徘徊

民先兄寄野花數枝狀似蓼而叢生夜置几案

幽香襲人戲成一闋

前調

南圃秋香過東籬菊未英蓼花無數滿寒汀中有一枝
纖軟吐微馨 被冷沈烟細燈青夢不成皎如明月入
窓櫺天女維摩相對兩忘情

甲子中秋微雨聞施君家宴戲贈

臨江仙

畫棟朱樓凌縹緲全家住在層城中秋風露助淒清香

凝燕寢遮莫下簾旌
佳節喜逢今夕月後房重按新
聲姮娥端解妬娉婷微雲點綴不放十分明

客贈梅花一枝香色奇絕為賦此詞

減字木
蘭花

芳心一點瘴霧難侵塵不染冷淡誰看月轉霜林怯夜
寒一枝孤靜夢破小窻曾記省燭影參差脉脉還如
背立時

符昌言寫寄朱胡梅詞酬唱語皆不凡因次其

韻

念奴
嬌

榕林葉暗見一枝獨與霜華爭白寫我精神惟賴有瀟
洒西湖詞客玉骨清羸水容冷落似恨關山隔蠻烟侵
妬未應減動肌雪 幽夢時遶芳枝夜寒誰見我身為
蝴蝶抱藥窺叢驚睡覺窓影橫斜和月謝館池邊松風
亭下忍使香消歌多情饒恨算應天解磨折

松風亭見
東坡梅詩

瓊臺元夕次太守韻

危閣臨流渺滄波萬頃湧出水輪星河澹天衢迥絕纖塵
瓊樓玉館徧人間水月精神清江瘴海乘流處處分身

邦侯盛集嘉賓有香風縹緲和氣氤氲華燈耀綺席
競笑語烘春窺簾映牖眷素娥偏顧幽人空悵望通明
觀闕遙瞻一朵紅雲

逢時使君出示所作送春佳詞引楚襄事因次

其韻

鷓鴣天

踏舞貪看赤脚娘送春春去莫悲傷飛花逐水歸何處
落絮沾泥不解狂都是醉任飛揚百年三萬六千場
使君親按新歌舞魂夢相逢笑楚襄

陳逢時置酒賓燕堂仍攜愛姬晚值雨作見示
佳詞輒次眼兒嬌韻

漠漠春陰人似霧那用繡簾垂不道持杯是阿誰須拚
倒金壘 人世渾如天上月離合比盈虧冒雨須來帶
雨歸神女解相隨

予頃在瓊山見桃李甚盛但臘月已開盡三春
未嘗見桃花每以為恨今歲寓昌江二月三日
與客遊黎氏園偶見桃花一枝羊君荆華折以

見贈恍然如逢故人歸插淨瓶中累日不凋予
既作二小詩同行皆屬和忽憶吾鄉桃花塢之
盛每至花發鄉中人多醵會往游醉後歌呼今
豈復得緬懷疇昔不無感歎因成長短句寄商
叟德矩二友若悟此空華即不復以存沒介懷
也

漁家
傲

海外無寒花發早一枝不忍簪風帽歸插淨瓶花轉好
維摩老年來却被花枝惱 忽憶故鄉花滿道狂歌痛

飲俱年少桃塢花開如野燒都醉倒花深往往眠芳草

